



NESLUŽBENI PREČIŠĆENI TEKST
(„Sl. novine BPK Goražde“, broj: 4/20, 4/21 i 2/22)

Bosna i Hercegovina
Federacija Bosne i Hercegovine
Bosansko-podrinjski kanton Goražde
MINISTARSTVO ZA BORAČKA PITANJA

P R A V I L N I K
o izmjenama pravilnika o uslovima, načinu i kriterijima
za odobravanje jednokratne novčane pomoći za socijalne potrebe
braniocima i članovima njihovih porodica
Bosansko-podrinjskog kantona Goražde

Goražde, januar 2022.godine

Na osnovu člana 56. i 66. Zakona o organizaciji organa uprave Goražde ("Službene novine Federacije BiH", broj: 35/05) i člana 210. Zakona o dopunskim pravima branilaca i članova njihovih porodica u Bosansko-podrinjskom kantonu Goražde ("Službene novine BPK Goražde", broj: 9/13, 11/14 i 15 /19), Ministar za boračka pitanja Bosansko-podrinjskog kantona Goražde, uz saglasnost Vlade Bosansko-podrinjskog kantona Goražde, **d o n o s i:**

P R A V I L N I K
o izmjenama pravilnika o uslovima, načinu i kriterijima
za odobravanje jednokratne novčane pomoći za socijalne potrebe
braniocima i članovima njihovih porodica
Bosansko-podrinjskog kantona Goražde

POGLAVLJE I - OSNOVNE ODREDBE

Član 1.
(Osnovne odredbe)

Ovim Pravilnikom definišu se korisnici prava, uređuju način i postupak ostvarivanja prava na jednokratnu novčanu pomoć za socijalne potrebe, podnošenje zahtjeva, obavezna dokumentacija, uslovi za ostvarivanje prava, nadležnost za odlučivanje, prioriteti pri ostvarivanju prava, način i postupak ostvarivanja prava i finansiranje ostvarivanja ovih prava.

Član 2.
(Korisnici prava)

(1) Pravo na jednokratnu novčanu pomoć za socijalne potrebe mogu ostvariti lica iz člana 1. i 2. Zakona o dopunskim pravima branilaca i članova njihovih porodica u Bosansko-podrinjskom kantonu Goražde ("Službene novine BPK Goražde", broj: 9/13, 11/14 i 15 /19, u daljem tekstu: Zakon).

Član 3.
(Objava javnog poziva)

Ministarstvo za boračka pitanja Bosansko-podrinjskog kantona Goražde (u daljem tekstu: Ministarstvo) za svaku godinu objavljuje javni poziv za ostvarivanje prava na jednokratnu novčanu pomoć za socijalne potrebe po usvajanju Budžeta Bosansko-podrinjskog kantona Goražde (u daljem tekstu: Kanton) i programa o utrošku sredstava.

POGLAVLJE II - NAČIN I POSTUPAK OSTVARIVANJA PRAVA NA DODJELU JEDNOKRATNE NOVČANE POMOĆI

Član 4.
(Način podnošenja zahtjeva)

(1) Zahtjevi za ostvarivanje prava na dodjelu jednokratne novčane pomoći za socijalne potrebe, lica iz člana 2. ovog Pravilnika podnose Ministarstvu na propisanom obrascu.

(2) Podneseni zahtjevi za ostvarivanje prava iz stava 1. ovog člana važe za budžetsku godinu u kojoj su podnijeti.

Član 5.
(Obavezna dokumentacija za ostvarivanje prava na jednokratnu novčanu pomoć)

- (1) a) Zahtjev sa tačnom adresom, brojem kontakt-telefona i brojem žiroračuna za podnosioca zahtjeva;
b) Dokaz o statusu branioca iz člana 1. Zakona;

- c) Dokaz o mjestu prebivališta podnosioca zahtjeva (uvjerenje CIPS);
- d) Uvjerenje da se podnosilac zahtjeva nalazi na evidenciji nezaposlenih lica Službe za zapošljavanje i da ne prima novčanu naknadu za vrijeme nezaposlenosti (za nezaposlene); ili dokaz o visini primanja (po osnovu boračko-invalidske zaštite, penzije i drugih osnova);

(2) Odobravanje jednokratne novčane pomoći za socijalne potrebe za lica iz člana 2. ovog Pravilnika vršit će se samo u izuzetno socijalno-ekonomski opravdanim slučajevima, odnosno licima koja se nalaze u teškim socijalno-ekonomskim uslovima, a koja zadovoljavaju opće i posebne uslove i utvrđene kriterije ukoliko ima raspoloživih sredstava za ove namjene.

(3) Braniocima i članovima njihovih porodica može se odobriti jednokratna novčana pomoć za socijalne potrebe samo na osnovu podnesenog zahtjeva i priloga iz kojih se može ustanoviti materijalno-socijalna situacija, tj. ako ispunjava opće i posebne uslove propisane ovim Pravilnikom.

Član 6.

(Opći uslovi za ostvarivanje prava na jednokratnu novčanu pomoć)

Pod uslovom da imaju prebivalište-boravište na području Kantona, opći kriteriji za ostvarivanje jednokratne novčane pomoći za socijalne potrebe jeste da podnosioci zahtjeva pripadaju jednoj od kategorija boračkih populacija, i to:

- a) Demobilisani branilac (uvjerenje nadležnog organa o pripadnosti Oružanim snagama u periodu od 18.09.1991. do 23.12.1995. godine najmanje jednu godinu dana);
- b) Ratni vojni invalidi i mirnodopski vojni invalidi (rješenje nadležnog organa);
- c) Član porodice šehida i poginulih i nestalih boraca i umrlih ratnih vojnih invalida (rješenje nadležnog općinskog organa) i član porodice umrlih demobilisanih branilaca (rodni list, vjenčani list i izvod iz matične knjige umrlih za umrlog demobilisanog branioca).

Član 7.

(Posebni uslovi za ostvarivanje prava na jednokratnu novčanu pomoć)

(1) Posebni uslovi za ostvarivanje jednokratne novčane pomoći za zadovoljenje socijalnih potreba su:

- a) Ukupna novčana neto primanja, uključujući i primanja po osnovu socijalne i boračko- invalidske zaštite, ne prelaze iznos 17% prosječne neto plaće isplaćene u Federaciji BiH u predhodnoj godini za podnosioca zahtjeva.
- b) Da podnosilac zahtjeva nije u radnom odnosu ili da nema riješen radno-pravni status (preduzeća u stečaju i likvidaciji, preduzeća čiji su žiro računi blokirani, sudski sporovi iz domena radnih odnosa i sl.).

Član 8.

(Kriteriji za utvrđivanje visine sredstava koja se odobravaju na ime ostvarenog prava)

(1) Visina sredstava koja se može odobriti za ostvarivanje prava na jednokratnu novčanu pomoć za socijalne potrebe iznosi 30% prosječne neto plaće isplaćene u Federaciji BiH u predhodnoj godini.

(2) Podnosiocu zahtjeva može se odobriti jednokratna pomoć za socijalne potrebe samo jednom u toku jedne budžetske godine.

Član 9.

(Nadležnost donošenja rješenja)

Ministarstvo provodi upravni postupak i donosi rješenje po zahtjevu stranke u skladu sa odredbama Zakona o upravnom postupku („Sl. novine Federacije BiH“ broj: 22/98 i 48/99).

Član 10.
(Postupak po žalbama)

(1) Ministarstvo je dužno prvostepeno rješenje na koje je izjavljena žalba zajedno sa spisom predmeta dostaviti Vladi Bosansko podrinjskog kantona Goražde - Komisiji za rješavanje o dopunskim pravima branilaca i članova njihovih porodica u drugom stepenu na nadležno postupanje.

(2) Protiv drugostepenog rješenja nije dopuštena žalba, ali se može pokrenuti upravni spor pred nadležnim Kantonalnim sudom.

POGLAVLJE IV-PRELAZNE I ZAVRŠNE ODREDBE

Član 11.
(Primjena općih propisa)

Za sve što nije regulisano ovim Pravilnikom primjenjuju se opći propisi.

Član 12.
(Način izmjena i dopuna)

Izmjene i dopune ovog Pravilnika se vrše na način i po postupku koji važi za njegovo donošenje.

Član 13.
(Tumačenje Pravilnika)

Tumačenje odredbi ovog Pravilnika daje ministar za boračka pitanja.

Član 14.
(Primjena Zakona o upravnom postupku)

Odredbe Zakona o upravnom postupku («Službene novine FBiH» broj: 2/98 i 48/99) primjenjuju se u svim pitanjima koja nisu uređena posebnim Zakonom i ovim Pravilnikom.

Član 15.
(Stupanje na snagu Pravilnika)

Ovaj Pravilnik stupa na snagu danom dobijanja saglasnosti od Vlade Bosansko-podrinjskog kantona Goražde, a naknadno će se objaviti u „Službenim novinama BPK Goražde“.

MINISTAR

Edin Aganović

Na ovaj Pravilnik, Vlada Bosansko-podrinjskog kantona Goražde je dala saglasnost odlukama broj: 03-11-395/20 od 28.02.2020.godine, broj: 03-11-565/21 od 08.04.2021.godine i broj: 03-11-76/22 od 21.01.2022.godine.